

現代生活藝術系列

華嚴經疏論纂要 82

— 佛不思議法品之二 —

華藏淨宗學會印贈

大方廣佛華嚴經疏論纂要卷第八十二

五臺山清涼國師澄觀疏鈔

太原方山長者李通玄論

閩鼓山私淑比丘道霈纂要

佛不思議法品第三十三之二

佛子。諸佛世尊有十種廣大佛事。無量無邊。不可思議。一切世間諸天及人。皆不能知。去來現在所有一切聲聞獨覺。亦不能知。唯除如來威神之力。

〔疏〕第四十種廣大佛事。明神通自在。卽答前一會神通問。先總標中。謂八相等中。皆有大用。微細相

容故以此攝物。故名佛事。於中先標名。無量下。顯勝。

何等爲十。所謂一切諸佛。於盡虛空徧法界一切世界。兜率陀天。皆現受生。修菩薩行。作大佛事。無量色相。無量威德。無量光明。無量音聲。無量言辭。無量三昧。無量智慧。所行境界。攝取一切人天。魔梵沙門婆羅門。阿脩羅等。大慈無礙。大悲究竟平等。饒益一切衆生。或令生天。或令生人。或淨其根。或調其心。或時爲說差別三乘。或時爲說圓滿一乘。普見普濟。度令出生死。是爲第一廣大佛事。

疏列中。先徵後釋。釋中。一明上生佛事。於中四。一別明能攝。二攝取下。所攝廣多。三大慈下。能攝殊勝。四或令下。所攝成益。

佛子。一切諸佛。從兜率天降神母胎。以究竟三昧觀受生法。如幻。如化。如影。如空。如熱時燄。隨樂而受。無量無礙。入無諍法。起無著智。離欲清淨。成就廣大妙莊嚴藏。受最後身。住大寶莊嚴樓閣。而作佛事。或以神力而作佛事。或以正念而作佛事。或現神通而作佛事。或現智日而作佛事。或現諸佛廣大境界而作佛事。或現諸佛無量光明而作佛事。或入無數廣大

三昧而作佛事。或現從彼諸三昧起而作佛事。佛子。如來爾時在母胎中爲欲利益一切世間種種示現而作佛事。所謂或現初生。或現童子。或現在宮。或現出家。或復示現成等正覺。或復示現轉妙法輪。或示現於入般涅槃。如是皆以種種方便於一切方。一切網。一切旋。一切種。一切世界中而作佛事。是爲第二廣大佛事。

疏一降神處胎佛事中。先明智德內圓。後受最後下。明神通外用。於中先一處一時作佛事。後佛子如來爾時下。總攝時處作佛事。此中多處。準下瞿

波乃至十重。此畧舉五。皆後後廣前前。一切方
者。卽娑婆。與能遶十三剎塵數剎。十方無間住故。
二彼上諸剎。復有眷屬剎等圍遶。交絡成網故。三
遶中間海十右旋海故。四盡華藏剎海諸剎種故。
五一切世界者。盡法界故。

佛子。一切諸佛。一切善業。皆已清淨。一切生智。皆已
明潔。而以生法誘導羣迷。令其開悟。具行衆善。爲衆
生故。示誕王宮。一切諸佛。於諸色欲。宮殿。妓樂。皆已
捨離。無所貪染。常觀諸有空無體性。一切樂具。悉不
真實。持佛淨戒。究竟圓滿。觀諸內宮。妻妾侍從。生大

悲愍。觀諸衆生。虛妄不實。起大慈心。觀諸世間。無一
可樂。而生大喜。於一切法。心得自在。而起大捨。其佛
功德。現生法界。身相圓滿。眷屬清淨。而於一切。皆無
所著。以隨類音。爲衆演說。令於世法。深生厭離。如其
所行。示所得果。復以方便。隨應教化。未成熟者。令其
成熟。已成熟者。令得解脫。爲作佛事。令不退轉。復以
廣大慈悲之心。恒爲衆生。說種種法。又爲示現三種
自在。令其開悟。心得清淨。雖處內宮。衆所咸覩。而於
一切諸世界中。施作佛事。以大智慧。以大精進。示現
種種諸佛神通。無礙無盡。恒住三種巧方便業。所謂

身業究竟清淨。語業常隨智慧而行。意業甚深無有障礙。以是方便利益衆生。是爲第二廣大佛事。

〔疏〕三現生處宮佛事。分二。初無生現生。是誕生相。後一切佛於諸色下。無染處染。是處王宮相。於中四。一三學自圓。無染是定故。二觀諸下。四心愍物。三具佛下。具德攝益。四雖處下。攝益廣深。

佛子。一切諸佛示處種種莊嚴宮殿。觀察猷離捨而田家。欲使衆生了知世法。皆是妄想無常敗壞深起。猷離不生染著。永斷世間貪愛煩惱。修清淨行利益衆生。當出家時。捨俗威儀。住無諍法。滿足本願無量。

功德以大智光滅世癡闇爲諸世間無上福田常爲
衆生讚佛功德。令於佛所植諸善本。以智慧眼見真
實義。復爲衆生讚說出家。清淨無過。永得出離。長爲
世間智慧高幢。是爲第四廣大佛事。

〔疏〕四出家佛事中。二。先明出家意。後當出家時下。
明出家相三業二利故。

佛子。一切諸佛具一切智。於無量法悉已知見。菩提
樹下成最正覺。降伏衆魔。威德特尊。其身充滿一切
世界。神力所作無邊無盡。於一切智所行之義。皆得
自在。修諸功德。悉已圓滿。其菩提座具足莊嚴。周徧

十方一切世界。佛處其上。轉妙法輪。說諸菩薩所有
行願。開示無量諸佛境界。令諸菩薩皆得悟入。修行
種種清淨妙行。復能示導一切衆生。令種善根。生於
如來平等地中。住諸菩薩無邊妙行。成就一切功德
勝法。一切世界。一切衆生。一切佛刹。一切諸法。一切
菩薩。一切教化。一切三世。一切調伏。一切神變。一切
衆生心之樂欲。悉善了知。而作佛事。是爲第五廣大
佛事。

〔疏〕五成道佛事中。三初明真覺舊圓。次菩提樹下。
應身今滿。後其菩提下。演法益生。此頓演華嚴。

佛子。一切諸佛轉不退法輪。令諸菩薩不退轉。故轉無量法輪。令一切世間咸了知。故轉開悟一切法輪。能大無畏。師子吼。故轉一切法智藏法輪。開法藏門。除闇障。故轉無礙法輪。等虛空。故轉無著法輪。觀一切法。非有無。故轉照世法輪。令一切衆生淨法眼。故轉開示一切智法輪。悉徧一切三世法。故轉一切佛同一法輪。一切佛法不相違。故一切諸佛以如是等無量無數百千億那由他法輪。隨諸衆生心行差別。而作佛事。不可思議。是爲第六廣大佛事。

〔疏〕六轉法輪佛事中。義通權實。先列後結。列中。一

唯菩薩乘通四不退。二通五乘。世成了故。三開權顯實。令悟知見決定有故。四通三藏。三藏除癡及三障故。五唯頓法。事理雙絕故。六中道法。不著二邊故。七世諦法。淨所知故。八唯佛法。智徧知故。九唯圓法。無異味故。後以如是下總結。卽無量乘爲第十輪。隨機演故。十皆圓融。爲不思議。

佛子。一切諸佛入於一切王都城邑。爲諸衆生而作佛事。所謂人王都邑。天王都邑。龍王夜叉王。乾闥婆王。阿脩羅王。迦樓羅王。緊那羅王。摩睺羅伽王。羅刹王。毗舍闍王。如是等王。一切都邑。入城門時。大地震

動光明普照。盲者得眼。聾者得耳。狂者得心。裸者得衣。諸憂苦者悉得安樂。一切樂器不鼓自鳴。諸莊嚴具若著不著。咸出妙音。衆生聞者無不欣樂。一切諸佛色身清淨。相好具足。見者無厭。能爲衆生作於佛事。所謂若顧視。若觀察。若動轉。若屈申。若行若住。若坐若臥。若默若語。若現神通。若爲說法。若有教勅。如是一切皆爲衆生而作佛事。一切諸佛普於一切無數世界種種衆生心樂海中。勸令念佛常勤觀察。種種善根修菩薩行。歎佛色相微妙第一。一切衆生難可值遇。若有得見而興信心。則生一切無量善法。集

佛功德普皆清淨。如是稱讚佛功德已。分身普往十方世界。令諸衆生悉得瞻奉。思惟觀察承事供養。種諸善根。得佛歡喜。增長佛種。悉當成佛。以如是行而作佛事。或爲衆生示現色身。或出妙音。或但微笑。令其信樂。頭頂禮敬。曲躬合掌。稱揚讚歎。問訊起居。而作佛事。一切諸佛。以如是等無量無數不可言說不可思議種種佛事。於一切世界中。隨諸衆生心之所樂。以本願力。大慈悲力。一切智力。方便教化。悉令調伏。是爲第七廣大佛事。

〔疏〕七威儀佛事。於中四。一別舉入城益物。二一切

諸佛色身下。通顯威儀益物。三一切諸佛昔於下。言談示現益物。其昔字。晉本所無。卽是現益。若言昔者。乃是舉因顯果。必是晉字。四一切諸佛。以如是下。總結深廣。

佛子。一切諸佛。或住阿蘭若處。而作佛事。或住寂靜處。而作佛事。或住空閑處。而作佛事。或住佛住處。而作佛事。或住三昧。而作佛事。或獨處園林。而作佛事。或隱身不現。而作佛事。或住甚深智。而作佛事。或住諸佛無比境界。而作佛事。或住不可見種種身。行隨諸衆生心樂欲。解方便教化。無有休息。而作佛事。或

以天身求一切智而作佛事。或以龍身。夜叉身。乾闥婆身。阿脩羅身。迦樓羅身。緊那羅身。摩睺羅伽。人非人等身。求一切智而作佛事。或以聲聞身。獨覺身。菩薩身。求一切智而作佛事。或時說法。或時寂默而作佛事。或說一佛。或說多佛而作佛事。或說諸菩薩一切行。一切願爲一行。願而作佛事。或說諸菩薩一行一願爲無量行。願而作佛事。或說佛境界卽世間境界而作佛事。或說世間境界卽佛境界而作佛事。或說佛境界卽非境界而作佛事。或住一日。或住一夜。或住半月。或住一月。或住一年。乃至住不可說劫爲

諸衆生而作佛事。是爲第八廣大佛事。

〔疏〕入起行佛事中有四。一身心安住行。蘭若唯山林寂靜通城邑空閑在無物。二或以天身下起。應上求行。三或時說法下。說默下化行。四或住一日下。時分進修行。

佛子。一切諸佛是生清淨善根之藏。令諸衆生於佛法中生淨信解。諸根調伏永離世間。令諸菩薩於菩提道。具智慧明不由他悟。或現涅槃而作佛事。或現世間皆悉無常而作佛事。或說佛身而作佛事。或說所作皆悉已辦而作佛事。或說功德圓滿無缺而作

佛事。或說永斷諸有根本而作佛事。或令衆生厭離
世間隨順佛心而作佛事。或說壽命終歸於盡而作
佛事。或說世間無一可樂而作佛事。或爲宣說盡未
來際供養諸佛而作佛事。或說諸佛轉淨法輪令其
得聞生大歡喜而作佛事。或爲宣說諸佛境界令其
發心而修諸行而作佛事。或爲宣說念佛三昧令其
發心常樂見佛而作佛事。或爲宣說諸根清淨勤求
佛道心無懈怠而作佛事。或詣一切諸佛國土觀諸
境界種種因緣而作佛事。或攝一切諸衆生身皆爲
佛身令諸懈怠放逸衆生悉住如來清淨禁戒而作

佛事。是爲第九廣大佛事。

〔疏〕九起用佛事中。二初顯起用所依。以是能生功德藏故。二或現涅槃下。正明起用。

佛子。一切諸佛入涅槃時。無量衆生悲號涕泣。生大憂惱。遙相瞻顧。而作是言。如來世尊有大慈悲。哀愍饒益。一切世間。與諸衆生爲救爲歸。如來出現。難可值遇。無上福田。於今永滅。卽以如是。令諸衆生悲號戀慕。而作佛事。復爲化度。一切天人龍神。夜叉乾闥婆阿脩羅迦樓羅緊那羅摩睺羅伽人。非人等故。隨其樂欲。自碎其身。以爲舍利。無量無數。不可思議。令

諸衆生起淨信心。恭敬尊重歡喜供養。修諸功德。具足圓滿。復起於塔。種種嚴飾。於諸天宮龍宮夜叉宮。乾闥婆阿脩羅迦樓羅緊那羅摩睺羅伽人非人等。諸宮殿中。以爲供養。牙齒爪髮。咸以起塔。令其見者。皆悉念佛念法念僧。信樂不迴。誠敬尊重。在在處處。布施供養。修諸功德。以是福故。或生天上。或處人間。種族尊榮。財產備足。所有眷屬。悉皆清淨。不入惡趣。常生善道。恒得見佛具衆白法。於三有中。速得出離。各隨所願。獲自乘果。於如來所知恩報恩。永與世間。作所歸依。佛子。諸佛世尊。雖般涅槃。仍與衆生。作不

思議清淨福田。無盡功德最上福田。令諸衆生善根具足。福德圓滿。是爲第十廣大佛事。佛子。此諸佛事。無量廣大不可思議。一切世間諸天及人。及去來今聲聞獨覺。皆不能知。唯除如來威神所加。

〔疏〕十涅槃佛事。別顯用中之一。於中三初明涅槃悲戀益。次復爲化度下。舍利流布益。後佛子下。總結益滿。若配十問。一本願。二卽種性及國土。三是無礙。四十皆解脫。五出現。六音聲。七身。八智慧。九自在。三結可知。

佛子。諸佛世尊有十種無二行自在法。何等爲十。所

謂一切諸佛悉能善說授記言辭決定無二。一切諸佛悉能隨順衆生心念令其意滿決定無二。一切諸佛悉能現覺一切諸法演說其義決定無二。一切諸佛悉能具足去來今世諸佛智慧決定無二。一切諸佛悉知三世一切剎那卽一剎那決定無二。一切諸佛悉知三世一切佛剎入一佛剎決定無二。一切諸佛悉知三世一切佛語卽一佛語決定無二。一切諸佛悉知三世一切諸佛與其所化一切衆生體性平等決定無二。一切諸佛悉知世法及諸佛法性無差別決定無二。一切諸佛悉知三世一切諸佛所有善

根同一善根決定無二。是爲十

〔疏〕第五無二。行自在法者。明無畏自在。兼答普光無畏之問。於事明審。決定無疑。故云無二。不畏他難。名爲自在。別中初四可知。次三通二義。一以理融相。二事事卽入。次二唯理。後一有三義。一同性修故。二互迴向故。三互主伴故。

佛子。諸佛世尊有十種住。住一切法。何等爲十。所謂一切諸佛住覺悟。一切法界。一切諸佛住大悲語。一切諸佛住本大願。一切諸佛住不捨調伏衆生。一切諸佛住無自性法。一切諸佛住平等利益。一切諸佛

住無忘失法。一切諸佛住無障礙心。一切諸佛住恒
正定心。一切諸佛住等入一切法不違實際相。是爲
十

〔疏〕第六明住。住一切法者。明三昧自在。兼答普光
三昧問。如來所住無非三昧。故徧住一切。文顯可
知。

佛子。諸佛世尊有十種知一切法。盡無有餘。何等爲
十。所謂知過去一切法盡無有餘。知未來一切法盡
無有餘。知現在一切法盡無有餘。知一切言語法盡
無有餘。知一切世間道盡無有餘。知一切衆生心盡

無有餘。知一切菩薩善根上中下種種分位盡無有餘。知一切佛圓滿智及諸善根不增不減盡無有餘。知一切法皆從緣起盡無有餘。知一切世界種盡無有餘。知一切法界中如因陀羅網諸差別事盡無有餘。是爲十

〔疏〕第七知一切法盡無有餘者。明十力自在。兼答普光十力之問。十力智慧。照境無遺故。亦顯可知。佛子。諸佛世尊有十種力。何等爲十。所謂廣大力。最上力。無量力。大威德力。難獲力。不退力。堅固力。不可壞力。一切世間不思議力。一切衆生無能動力。是爲

十佛子。諸佛世尊有十種大那羅延幢勇健法。

〔疏〕第八廣大力者。明神力自在。亦答普光十力之問。文中亦三初標。次何等下。徵釋。三結。今初。十力是別名。大那羅延等是總稱。故下列中。但依總名。是則標中十力。一一徧下別中。別中十門。一一具前標中十力。則成百門。古德將標中十力。次第配下十勇健法。謂初爲廣大力等。則令別中一門。不攝前十。不成百門。亦令餘門無廣大義。初門無最上等。說欲從勝配者。應逆次配之。十中一廣大者。周法界故。二最上者無加過故。三無分量故。四可

敬畏故。五。唯佛得故。六。作無屈故。七。當體堅故。八。
緣不壞故。九。超言念故。十。不可摧故。

何者爲十。所謂一切諸佛身不可壞。命不可斷。世間
毒藥所不能中。一切世界水火風災皆於佛身不能
爲害。一切諸魔。天龍。夜叉。乾闥婆。阿脩羅。迦樓羅。緊
那羅。摩睺羅伽人。非人。毗舍闍。羅刹等。盡其勢力。兩
大金剛。如須彌山及鐵圍山。徧於三千大千世界。一
時俱下。不能令佛心有驚怖。乃至一毛亦不搖動。行
住坐臥。初無變易。佛所住處。四方遠近。不令其下。則
不能雨。假使不制而從雨之。終不爲損。若有衆生爲

佛所持。及佛所使。尚不可害。況如來身。是為諸佛第一。大那羅延幢勇健法。

〔疏〕次徵釋中。第一身命不可壞力。今逆次配。此即不可動力。乃至一毛不搖動故。文中二先正明不可動壞。謂情非情境。俱不能壞。後若有衆生下舉。况顯勝。如今耆婆入火取子。入獄問罪等。鈔如令耆婆入

火者現相已引。入獄問罪。即報恩經第四。令耆婆往阿鼻地獄。問調達云。汝今受罪云何。調達答云。如第三禪樂。今取入中問罪。苦不能害耳。

佛子。一切諸佛。以一切法界諸世界中。須彌山王。及鐵圍山。大鐵圍山。大海。山林宮殿屋宅。置一毛孔。盡

未來劫。而諸衆生不覺不知。唯除如來神力所被佛子。爾時諸佛於一毛孔持於爾所一切世界。盡未來劫。或行或住。或坐或臥。不生一念勞倦之心。佛子。譬如虛空。普持一切徧法界中所有世界。而無勞倦。一切諸佛於一毛孔持諸世界。亦復如是。是爲諸佛第二大那羅延幢勇健法。

〔疏〕第二毛孔容持力。卽是不可思。而諸衆生不覺知矣。

佛子。一切諸佛能於一念起。不可說不可說世界微塵數步。一一步。過不可說不可說佛刹微塵數國土。

如是而行。經一切世界微塵數劫。佛子。假使有一大金剛山。與上所經一切佛刹。其量正等。如是量等大金剛山。有不可說不可說佛刹微塵數。諸佛能以如是諸山。置一毛孔。佛身毛孔。與法界中一切衆生毛孔數等。一一毛孔。悉置爾許大金剛山。持爾許山。遊行十方。入盡虛空。一切世界。從於前際。盡未來際。一切諸劫。無有休息。佛身無損。亦不勞倦。心常在定。無有散亂。是爲諸佛第三大那羅延幢勇健法。

〔疏〕第三毛持大山力。卽當不壞。以雖持多大山。身心無勞損。故文中速行廣步。多劫行刹。爲一山之

量此山已無邊矣。况有多山在於一毛。况復多毛。窮劫持任。實難思之境矣。

佛子。一切諸佛一座食已。結跏趺坐。經前後際不可說劫。入佛所受不思議樂。其身安住寂然不動。亦不廢捨化衆生事。佛子。假使有人於徧虛空一一世界。悉以毛端次第度量。諸佛能於一毛端處結跏趺坐。盡未來劫。如一毛端處。一切毛端處。悉亦如是。佛子。假使十方一切世界所有衆生。一一衆生其身大小。悉與不可說佛刹微塵數世界量等。輕重亦爾。諸佛能以爾所衆生。置一指端。盡於後際所有諸劫。一切

指端皆亦如是。盡持爾許一切衆生。入徧虛空。一一世界。盡於法界。悉使無餘。而佛身心。曾無勞倦。是爲諸佛第四大那羅延幢勇健法。

〔疏〕第四定用自在力。卽是堅固定力安住故。

佛子。一切諸佛能於一身。化現不可說不可說佛刹微塵數頭。一一頭。化現不可說不可說佛刹微塵數舌。一一舌。化現不可說不可說佛刹微塵數差別音聲。法界衆生靡不皆聞。一一音聲。演不可說不可說佛刹微塵數脩多羅藏。一一脩多羅藏。演不可說不可說佛刹微塵數法。一一法。有不可說不可說佛刹

微塵數文字句義。如是演說盡不可說不可說。佛刹微塵數劫。盡是劫已。復更演說盡不可說不可說。佛刹微塵數劫。如是次第。乃至盡於一切世界微塵數。盡一切衆生心念數。未來際劫猶可窮盡。如來化身所轉法輪。無有窮盡。所謂智慧演說法輪。斷諸疑惑。法輪。照一切法法輪。開無礙藏法輪。令無量衆生歡喜調伏法輪。開示一切諸菩薩行法輪。高升圓滿大智慧日法輪。普然照世智慧明燈法輪。辯才無畏種種莊嚴法輪。如一佛身以神通力轉如是等差別法輪。一切世法無能爲喻。如是盡虛空界一一毛端分

量之處有不可說不可說佛刹微塵數世界。一一世界。念念現不可說不可說佛刹微塵數化身。一一化身。皆亦如是所說音聲文字句義。一一充滿一切法界。其中衆生皆得解了。而佛言音無變無斷無有窮盡。是爲諸佛第五大那羅延幢勇健法。

〔疏〕第五常徧演法力。此卽不退言音無變無斷盡。故文中二初明一身轉後如一佛下。明多身轉前中三初顯所說多次。如是演說下。明所說常後所謂下。示所說體後多身可知。是則常恒之說。前後無涯。生盲之徒對而莫覩。隨所感見。說有始終。

佛子。一切諸佛皆以德相莊嚴。智臆猶若金剛。不可損壞。菩提樹下結跏趺坐。魔王軍衆其數無邊。種種異形。甚可怖畏。衆生見者。靡不驚懾。悉發狂亂。或時致外。如是魔衆徧滿虛空。如來見之心無恐怖。容色不變。一毛不豎。不動不亂。無所分別。離諸喜怒。寂然清淨。住佛所住。具慈悲力。諸根調伏。心無所畏。非諸魔衆所能傾動。而能摧伏一切魔軍。皆使迴心。稽首歸依。然後復以三輪教化。令其悉發。阿耨多羅三藐三菩提意。永不退轉。是爲諸佛第六大那羅延幢勇健法。

〔疏〕第六德相降魔力卽當難獲。然十皆難獲。世多
魔惑。偏立難獲之名。

佛子。一切諸佛有無礙音。其音普徧十方世界。衆生
聞者自然調伏。彼諸如來所出音聲。須彌盧等一切
諸山不能爲障。天宮。龍宮。夜叉宮。乾闥婆。阿脩羅。迦
樓羅。緊那羅。摩睺羅伽。人非人等一切諸宮所不能
障。一切世界高大音聲亦不能障。隨所應化一切衆
生靡不皆聞。文字句義悉得解了。是爲諸佛第七大
那羅延幢勇健法。

〔疏〕第七圓音徧徹力。卽是威德聞皆調伏故。

佛子。一切諸佛心無障礙。於百千億那由他不可說不可說劫。恒善清淨。去來現在一切諸佛同一體性。無濁無翳。無我無我所。非內非外。了境空寂。不生妄想。無所依。無所作。不住諸相。水斷分別。本性清淨。捨離一切攀緣。憶念於一切法常無違諍。住於實際。離欲清淨。入真法界。演說無盡。離量非量。所有妄想。絕爲無爲。一切言說。於不可說無邊境界。悉已通達。無礙無盡。智慧方便。成就十力。一切功德。莊嚴清淨。演說種種無量諸法。皆與實相不相違背。於諸法界三世諸法。悉等無異。究竟自在。入一切法最勝之藏。一

切法門正念不惑安住十方一切佛刹而無動轉。得不斷智。知一切法究竟無餘。盡諸有漏。心善解脫。慧善解脫。住於實際通達無礙。心常正定。於三世法及以一切衆生心行。一念了達皆無障礙。是爲諸佛第八大那羅延幢勇健法。

〔疏〕第八心無障礙力。卽無量力。離量非量故。初無塵惑障礙。後於不可說下。起用無障礙心。善解脫者。由三種相。一於諸行徧了知故。二於彼相應諸煩惱斷得作證故。三煩惱斷已於一切處離愛住故。

佛子。一切諸佛同一法身。境界無量身。功德無邊身。世間無盡身。三界不染身。隨念示現身。非實非虛平等清淨身。無來無去無爲不壞身。一相無相法自性身。無處無方徧一切身。神變自在無邊色相身。種種示現普入一切身。妙法方便身。智藏普照身。示法平等身。普徧法界身。無動無分別非有非無常清淨身。非方便非不方便。非滅非不滅。隨所應化一切衆生種種信解而示現身。從一切功德寶所生身。具一切諸佛法真如身。本性寂靜無障礙身。成就一切無礙法身。徧住一切清淨法界身。分形普徧一切世間身。

無攀緣無退轉。永解脫。具一切智。普了達身。是爲諸佛第九大那羅延幢勇健法。

〔疏〕第九法身微密力。卽是最上。此總收前八後一。更無加故。文列二十五身。或卽應之真。卽真之應。卽性之相。卽理之智。十身圓融同一法界之身。不可配於報化。故云最上微密。

佛子。一切諸佛等悟一切諸如來法。等修一切諸菩薩行。若願若智清淨平等。猶如大海悉得滿足。行力尊勝未曾退怯。住諸三昧無量境界。示一切道勸善誠惡。智力第一。演法無畏。隨有所問悉能善答。智慧。

說法平等清淨。身語意行悉皆無雜。住佛所住。諸佛
種性以佛智慧而作佛事。住一切智。演無量法。無有
根本。無有邊際。神通智慧不可思議。一切世間無能
解了。智慧深入見一切法。微妙廣大無量無邊三世
法門咸善通達。一切世界悉能開曉。以出世智於諸
世間作不可說種種佛事。成不退智。入諸佛數。雖已
證得不可言說離文字法。而能開示種種言辭。以普
賢智集諸善行。成就一念相應妙慧。於一切法悉能
覺了。如先所念一切衆生皆依自乘而施其法。一切
諸法。一切世界。一切衆生。一切三世。於法界內如是。

境界其量無邊。以無礙智。悉能知見佛子。一切諸佛。於一念頃。隨所應化。出興於世。住清淨土。成等正覺。現神通力。開悟三世一切衆生。心意及識。不失於時。佛子。衆生無邊。世界無邊。法界無邊。三世無邊。諸佛最勝。亦無有邊。悉現於中。成等正覺。以佛智慧。方便開悟。無有休息。佛子。一切諸佛。以神通力。現最妙身。住無邊處。大悲方便。心無障礙。於一切時。常爲衆生演說妙法。是爲諸佛第十大那羅延幢勇健法。佛子。此一切諸佛。大那羅延幢勇健法。無量無邊。不可思議。去來現在一切衆生。及以二乘。不能解了。唯除如

來神力所加

〔疏〕第十具足。行智力。卽是廣大力。因行如海。果智
昔周五無邊界。大用無涯。故文中四。一萬行圓淨。
二住佛所住下。智用圓周。三雖已證下。動靜自在。
四佛子一切諸佛下。用無涯畔。上之十力。不出三
業。可以思準。第三佛子此一切下。總結可知。

第八有八門答自在竟

○第九三門答無礙問

佛子。諸佛世尊有十種決定法。何等爲十。所謂一切
諸佛定從兜率壽盡下生。一切諸佛定示受生處胎。

十月。一切諸佛定厭世俗樂求出家。一切諸佛決定坐於菩提樹下成等正覺悟諸佛法。一切諸佛定於一念悟一切法。一切世界示現神力。一切諸佛定能應時轉妙法輪。一切諸佛定能隨彼所種善根。應時說法而爲授記。一切諸佛定能應時爲作佛事。一切諸佛定能爲諸成就菩薩而授記。一切諸佛定能一念普答一切衆生所問。是爲十

〔疏〕一明所作決定。無能爲礙。此約一類世界。故云決定於異類界。未必定然。又約佛定能爲。故云決定耳。

佛子。諸佛世尊有十種速疾法。何等爲十。所謂一切諸佛若有見者。速得遠離。一切惡趣。一切諸佛若有見者。速得圓滿殊勝功德。一切諸佛若有見者。速能成就廣大善根。一切諸佛若有見者。速得往生淨妙天上。一切諸佛若有見者。速能除斷一切疑惑。一切諸佛若已發菩提心而得見者。速得成就廣大信解。永不退轉。能隨所應教化衆生。若未發心。卽能速發阿耨多羅三藐三菩提心。一切諸佛若未入正位而得見者。速入正位。一切諸佛若有見者。速能清淨世出世間一切諸根。一切諸佛若有見者。速得除滅一

切障礙。一切諸佛若有見者。速能獲得無畏辯才。是爲十

〔疏〕二速疾法者。明令他無礙。如如意寶。見速獲益。而薄福不覩。十句五對。一離惡趣圓勝德。二成善。因感樂果。三除疑惑滿大心。四始入位終清淨。五淨二礙具四辨。

佛子。諸佛世尊有十種應常憶念清淨法。何等爲十。所謂一切諸佛過去因緣。一切菩薩應常憶念。一切諸佛清淨勝行。一切菩薩應常憶念。一切諸佛滿足諸度。一切菩薩應常憶念。一切諸佛成就大願。一切

菩薩應常憶念。一切諸佛積集善根。一切菩薩應常
憶念。一切諸佛已具梵行。一切菩薩應常憶念。一切
諸佛現成正覺。一切菩薩應常憶念。一切諸佛色身
無量。一切菩薩應常憶念。一切諸佛神通無量。一切
菩薩應常憶念。一切諸佛十力無畏。一切菩薩應常
憶念。是爲十

〔疏〕三應憶念清淨者。舉佛無二礙勸物念持

第九三門答無礙問竟

○第十三門答解脫問

佛子。諸佛世尊有十種一切智住。何等爲十。所謂一

切諸佛於一念中。悉知三世一切衆生心心所行。一切諸佛於一念中。悉知三世一切衆生所集諸業及業果報。一切諸佛於一念中。悉知一切衆生所宜以三種輪教化調伏。一切諸佛於一念中。盡知法界一切衆生所有心相。於一切處普現佛興。令其得見方便攝受。一切諸佛於一念中。普隨法界一切衆生心樂欲解。示現說法令其調伏。一切諸佛於一念中。悉知法界一切衆生心之所樂爲現神力。一切諸佛於一念中。徧一切處。隨所應化。一切衆生示現出興。爲說佛身不可取著。一切諸佛於一念中。普至法界一

切處一切衆生。彼彼諸道。一切諸佛。於一念中。隨諸衆生。有憶念者。在在處處。無不往應。一切諸佛。於一念中。悉知一切衆生。解欲爲其示現。無量色相。是爲十。佛子。諸佛世尊。有十種無量不可思議。佛三昧。何等爲十。所謂一切諸佛。恒在正定。於一念中。徧一切處。普爲衆生。廣說妙法。一切諸佛。恒在正定。於一念中。徧一切處。普爲衆生。說無我際。一切諸佛。恒住正定。於一念中。徧一切處。普入三世。一切諸佛。恒在正定。於一念中。徧一切處。普入十方。廣大佛刹。一切諸佛。恒在正定。於一念中。徧一切處。普現無量種種佛。

身。一切諸佛恒在正定。於一念中徧一切處。隨諸衆生種種心解現身語意。一切諸佛恒在正定。於一念中徧一切處。說一切法。離欲真際。一切諸佛恒住正定。於一念中徧一切處。演說一切緣起自性。一切諸佛恒住正定。於一念中徧一切處。示現無量世出世間廣大莊嚴。令諸衆生常得見佛。一切諸佛恒住正定。於一念中徧一切處。令諸衆生悉得通達。一切佛法無量解脫。究竟到於無上彼岸。是爲十佛子。諸佛世尊有十種無礙解脫。何等爲十。所謂一切諸佛能於一塵現不可說不可說諸佛出興於世。一切諸佛

能於一塵現不可說不可說諸佛轉淨法輪。一切諸佛能於一塵現不可說不可說衆生受化調伏。一切諸佛能於一塵現不可說不可說諸佛國土。一切諸佛能於一塵現不可說不可說菩薩授記。一切諸佛能於一塵現去來今一切諸佛。一切諸佛能於一塵現去來今諸世界種。一切諸佛能於一塵現去來今一切神通。一切諸佛能於一塵現去來今一切衆生。一切諸佛能於一塵現去來今一切佛事。是爲十

〔疏〕初門明智障解脫智安事理。故名爲任。由離障故。一切能知。二無量不思議三昧者。明定障解脫。

由離障故用廣爲無量體深不可思議故十種之中。各先明在定後一念徧用。三無礙解脫者明業用解脫。智論云菩薩有不思議解脫諸佛有無礙解脫。所作無障。脫拘礙故。故各於一塵頓爲微細作用。若別答十問者。一答出現。二音聲。三本願願化盡故。四國土。五卽智慧能授菩薩之記。六佛身。七卽種性。云世界種。入世化物之種。應非世界海中之種。以前有國土竟故。八自在。九是無礙利生無礙故。十卽解脫無不爲故。旣隨一問皆答十問。則包含該攝。是以各不思議。然文少結束。似經來

未盡或顯佛德無盡故相海等。猶答前問故。

第十有三門答解脫問竟

論此品大意。明從前進修至此。自己三業廣大用。會佛三業廣大用故。所明業用。不離二諦真俗二門。一一十法之中。身語智爲體。餘七是三業上用。故以青蓮華藏菩薩答前十問。有三十二種答。一。一答中。皆有十無盡法。故意明至此佛果三業用中。真俗法滿足。故號佛爲無上兩足尊也。

佛不思議法品竟

建安縣秦溪外里弟子梁大順法名太
藝捐貲刊刻
華嚴經佛不思議法品疏論纂要第八
十二卷永遠流通伏願
故考梁以俊妣丁氏賽娘永出苦輪超
生樂地更祈早得福慧之男永紹箕裘
之業仰報四恩普資三有
康熙己未年三月
華藏室謹題

大方廣佛華嚴經疏論纂要卷第八十二